



Broj: **03/1-03-991-2/17**

Sarajevo, 7.6.2017.

PREDMET: Informacija o radnoj posjeti Centru za uklanjanje mina u BiH - BHMAC-u

Predsjedavajući Zajedničke komisije za odbranu i sigurnost BiH Sifet Podžić i članovi Komisije Hanka Vajzović i Šemsudin Mehmedović posjetili su 24. aprila 2017. godine u Sarajevu sjedište Centra za uklanjanje mina u BiH (BHMAC) gdje su o stanju i rezultatima rada, te planovima BHMAC-a razgovarali sa v. d. direktora Centra Sašom Obradovićem, njegovim saradnicima i Blažanom Kovačem, članom Komisije za deminiranje Vijeća ministara BiH.

Posebna pažnja tokom radne posjete bila je posvećena realizaciji protuminskih akcija, kao i operativnom planu protuminskog djelovanja u BiH za 2017. godinu. Bilo je riječi i o izdvajanju finansijskih sredstava za protuminsko djelovanje, te provođenju Strategije protuminskog djelovanja u BiH.

Razgovarano je o objektivnim mogućnostima za okončanje problema u BiH u vezi s minama, te potrebi da se stvore uslovi za izradu realnih i ostvarivih budućih strategija protuminskog djelovanja u BiH.

Saša Obradović, v.d. direktora BHMAC-a, upoznao je članove Zajedničke komisije za odbranu i sigurnost BiH o situaciji u vezi s minama u BiH, sadašnjoj strukturi, efektima upozorenja na mine i pomoći žrtvama od mina, finansiranju protuminskog djelovanja u Bosni i Hercegovini, te kapacitetima i planovima za 2017. i 2018. godinu.

Kada je u pitanju finansiranje protuminskog djelovanja, Obradović je istakao strukturu finansiranja u entitetima, kantonima, gradovima, općinama, javnim preduzećima i privatnom sektoru. Naglasio je da su najveći međunarodni donatori Povjerenički fond za deminiranje ITF, EU i UNDP, a da su SAD, SR Njemačka, Kraljevina Norveška i Švicarska Konfederacija najveći donatori pojedinačno.

Trenutno je 26 akreditiranih organizacija za protuminsko djelovanje u BiH s 1200 akreditiranih deminera i operativnim osobljem.

Najveći izazovi u BHMAC-u su usaglašavanje Zakona o izmjenama i dopunama Zakona o deminiranju u BiH, revizija Strategije protuminskog djelovanja 2009.-2019. godine te izmjene i dopune stručne regulative.

Potrebno je što prije BHMAC-u nabaviti adekvatnu zaštitnu opremu (70 komada pancira i 40 komada vizira, novu kompjutersku opremu, softver za elektronsko poslovanje i GPS sisteme za povezivanje na permanentnu GPS mrežu u BiH.

Menadžment BHMAC-a aktuelizirao je i pitanje rješavanja trajnog smještaja za glavno sjedište jer su potrebe za adekvatnim prostorom evidentne. Kao moguća rješenja trajnog i adekvatnog smještaja glavnog sjedišta BHMAC-a razmatraju se slobodni vojni objekti u kasarni Rajlovac (vlasništvo MOBiH i dio vojnog kampa Butmir). U oba slučaja bi se smanjio sadašnji iznos koji BHMAC plaća kao najamninu za smještaj. Prisutni članovi Zajedničke komisije obavezali su se da će predsjedavajući Sifet Podžić održati sastanak s menadžmentom BHMAC-a, Komisijom za deminiranje VMBiH i ministrom civilnih poslova Adilom Osmanovićem o mogućnosti trajnog smještaja BHMAC-a.

Menadžment BHMAC-a istakao je da imaju veoma dobru saradnju s Komisijom za deminiranje Vijeća ministara BiH čiji članovi odgovorno i partnerski rješavaju aktuelne probleme.

PREDSJEDAVAJUĆI KOMISIJE

Sifet Podžić

Dostavljeno:

- naslovu
- a/a